

四庫全書

集部

欽定四庫全書

宋詩紀事卷九十八

錢塘厲鶚撰

欽宗皇帝

帝諱桓徽宗皇帝長子大觀五年立為皇太子
宣和七年詔嗣位改元靖康在位二年金人圍
汴脅上皇及帝北行康王即位于南京遙上尊
號曰孝慈淵聖皇帝紹興三十一年帝崩問至
上尊諡曰恭文順德仁孝皇帝廟號欽宗

降筆

星袍玉帶落邊塵幾見東風作好春因過江南省宗廟
眼前誰是舊京人

齊東野語向嘗于貴家觀降仙叩其姓名不荅
忽作薛稷體大書一詩云云捧箕者大驚知為
淵聖降也

馬巫父

巫父弋陽人玉華山地仙胡天放降仙作詩

絕句

玉樓雲淡曉光浮中有飛仙駕鶴游下界此時方睡熟

誰尋紫氣問青牛

志雅堂雜鈔

三茅真人

三茅真人胡天放降仙作詩

絕句

深深門巷老翁家自洗銅瓶浸杏花喚起承平當日夢

令人轉憶舊京華

志雅堂雜鈔

鄭文選

文選胡天放降仙作詩

九洞

拖露搏風海嶠來
觚棱寂寂自樓臺
春光不比承平日

淚眼看花薦一杯

志雅堂雜鈔

張君有

君有眉山書房吏
人胡天放降仙作詩

蘭渚

光轉東風弄暖天
永和人物尚依然
誰憐紉佩淒涼客

倚策愁吟楚澤邊

志雅堂雜鈔

方武表

武表莆人劉潛夫之友胡天放降仙求賦自稱

大陽洞主

詠筆

貌出中山肯欲仙何人拔穎縛尖圓拙夫堪笑堆成冢
豪客曾聞掃似椽窗下玉蜍涵夜月几間雪齒湧春泉
當時定遠成何事輕擲毛錐恐未然

志雅堂雜鈔

王大圭

大圭江寧人胡天放降仙作詩

絕句

六朝盛事總成塵
結綺樓前草自春
一曲後庭何處覓
空留月伴倚闌人

志雅堂雜鈔

卜仙

詠萍

點點青青浮野塘
不容明月照滄浪
風吹雨逐沙泥上

燕子銜來遶畫梁

全芳備祖

吉州紫姑

詠手

笑折櫻桃力不禁時攀楊柳弄春陰
管弦曲裏傳聲慢
星月樓前斂拜深
繡幕偷回雙舞袖
綠窗閒整小眉心
秋來幾度挑羅襪
為憶相思故却針

夷堅志

鄧氏紫姑

詠衣領二首

小翦雲羅雪色明香煤隨意作真行新詩便是班昭戒
勝却閒書座右銘

時樣新裁鬪色衣不將絲線縷花枝殷勤只要詩仙句
繡出分明一段奇

桃花

武陵溪上舊時花兩岸晴紅爛彩霞試問劉郎緣底事
花開時節未還家

以上夷堅志

斜橋紫姑

詠鱗

寒巖雪壓松枝折
班班剝盡青蚪血
運斤巧匠斲削成
劒脊半開魚尾裂
五湖仙子多奇致
欲駕神舟探仙穴
碧雲不動曉山橫
數聲搖落江天月

齊東野語紹興斜橋客邸有請紫姑者命鱗為題賦詩云云

紫姑神

句

簾卷滕王閣
盆翻白帝城

詠雨

許彥周詩話

周瑤英

瑤英芙蓉城女仙

別王子高

久事屏帷不暫閒
今朝離思尚闌珊
臨行惟有相思淚

滴在羅衣一半斑

王梅溪蘇詩注王子高傳

無名女仙

三絕句

柳條金嫩不勝鴉
青粉牆頭道韞家
燕子未來春寂寞

小窗和雨夢梨花

松影侵壇琳觀靜
桃花流水石橋寒
東風吹過雙蝴蝶
人倚危樓第幾闌

屈曲闌干月半規
藕花香澹水漪漪
分明一夜文姬夢
只有青團扇子知

癸辛雜識
董無益所記友人姚天澤亦喜此

宋詩紀事卷九十八

欽定四庫全書

宋詩紀事卷九十九

錢塘厲鶚撰

福州社神

投蔡君謨

遠入青青疊疊峯峯前真宰讀書宮半巖冷落高宗雨
一枕淒涼吉甫風烟鎖豹眠閒霧露井凋鳳宿舊梧桐
九龍山下英雄氣盡屬君家世胄中

墨莊漫錄蔡君謨作福守日有一書生投詩來
謁君謨異之尋令人伺其所歸至一山下忽不

見四顧無人唯一社屋爾意其社神也

金華神

別吳生

羅韞香消九九秋淚痕空對月明流塵埃不見金華路
滿目西風總是愁

崔伯易金華神記汴人有吳生者以娶宗女得
官于三班嘉祐中罷高郵通寓其家于治所而
獨與兄子南適錢塘道出晉陵纖舟于望亭堰
下是夜月明風高生乃危坐舷上久之忽有緋
衣披髮持刃炬自竹林間出者後引一女子冠
玉鳳冠曳蛟綃文錦之衣顏色甚麗而年十八

九耳生見而驚俄頃至岸側回叱緋衣者曰可
去矣無久留也于是滅炬泣拜去女子即登舟
面生坐謂生曰見向來緋衣者乎此君之夙仇
也而索君且數十年矣乃今方得之第以我故
得免不然今夕君當死其手生聞益驚駭不自
安女子笑曰君怯耶即以金縷衣置肩上生稍
安乃問曰若神歟其鬼耶女子曰我非人亦非
鬼蓋金華神也過去生中嘗與君為姻好故相
救耳遂相與入舟中取酒共飲其言笑諧謔悉
如常人然生誠曰母高聲恐兄子知之女子曰
我聲特君可聞他人雖厲聲亦不能聞也至明
起謂生曰舟楫已有曉色勢不能久留當與君
子訣矣君後十年遊華山日多置朱粉于路隅
梧桐下揚之雖然君今不可終此行恐復有不
濟也因索筆題詩一章書已輒復流涕歔歔而
去明日思其言遂回棹不復南去

謝中舍

詠落花

流水難窮目斜陽易斷腸誰同研光帽一曲舞山香

東坡志林寇元弼言徐州通判李陶有子年十七八素不善作詩忽詠落花詩云云父驚問之若有物憑附者自云是謝中舍問研光帽事云西王母宴羣仙有舞者帶研光帽帽上簪花舞山香一曲曲未終花皆落去

無名神

降于鄭澤家吟詩

忽然湖上片雲飛，不覺舟中雨濕衣。
折得蓮花渾忘却，

空將荷葉蓋頭歸。

陸游避暑漫抄

淮湄龍女

贈張孝和

落帆且泊小沙灘，霜月無波淮上寒。
若向江湖得消息，為傳風水到長安。

詩話總龜張孝和關中人淳化壬辰游淮南被
酒入淮湄龍女祠，忽簾中有婦人邀而置酒贈
詩一絕。孝和告去，回顧唯古祠敗舍而已。

散花天女

夢中戲秦少游

不知水宿分風浦何似秋眠借竹軒
聞道詩詞妙天下廬山對眼可無言

冷齋夜話秦少游南遷宿廬山宮亭湖廂下登岸縱望久之歸臥舟中聞風聲側枕視微波月影縱橫追憶昔常宿雲老借竹軒見西湖月色如此遂夢美人自言維摩詰散花天女也以維摩詰像來求贊少游愛其畫默念曰非道子不能作此天女以詩戲少游云云

夢中宮女

拋毬曲

侍燕黃昏曉未休
玉階夜色月如流
朝來自覺承恩最
笑倩傍人認繡毬

隋家宮殿鎖清秋
曾見嬋娟颺繡毬
金鑰玉簫俱寂寂

一天明月照高樓

此首見侯鯖錄

堪恨隋家幾帝王
舞裊揉盡繡鴛鴦
如今重到拋毬處
不是金爐舊日香

沈括夢溪筆談福州士人李慎言字希古嘗夢至一處水殿中觀宮女戲毬山陽蔡繩為之傳

飲其事甚詳有拋毬曲十餘詞皆清麗今獨記
兩闋

西華寶懿夫人

遺王子霞

靈臺本清風花草相葳蕤宮深藏白日金堂吐華輝彈
碁玉局寒鬪草珠露晞閨苑多美人形飛心不移醉眼
憑春風惟有胡蝶知如何忽相失負我雲際期而今才
鬢脚迤邐秋婦絲紫情祕消息行雲住無時世間苦寂
寥空此隨盛衰

王照新志王綸字子霞其家嘗有神降自稱西華寶懿夫人年二十餘絕色也其形或見有詩以遺子霞

燕華君

贈王綸

君為秋桐我為春風春風會使秋桐變秋桐不識春風面

中山詩話海陵人王綸女輒為神所憑自稱燕華君字善數品形製不相犯吟雪詩云何事月娥欺不在亂飄瑞葉落人間說云天上有瑞木花六出他詩句詞意飄逸類非世俗可較題金

山云清頭風卷雪山脚石蟠蚪嘗謂綸為清非
孺子贈詩云云居數歲神舍女女惛然無知嫁
為廣陵呂氏妻

湘妃

題廟中

碧杜紅蘅縹緲香冰絲彈月弄新涼
峯巒向曉渾相似
九處堪疑九斷腸

許彥周詩話有客泊廟前夜半偶不寐見輿衛
入廟中置酒鼓琴心悸不敢窺殆明方散隱隱
絕水浮空去因入廟見詩四句墨色猶未乾

玉源靈源桃源三夫人

中秋月

金風時拂袂氣象更分明不是月華別都緣秋氣清一

輪方極滿羣籟正無聲曉魄沈烟外人間萬事驚

玉源夫人

高秋渾似水萬里正圓明玉兔步虛碧冰輪輾太清廣

寒宮有路桂子落無聲吾館無弦彈棲鳥莫要驚

靈源夫人

金吹掃天幕無雲方瑩然九秋今夕半萬里一輪圓皓

彩盈虛碧清光射玉川瑤尊休惜醉幽意正綿綿

桃源夫人

詩話總龜陳純字元朴莆田人因遊桃源中秋
遇玉源靈源桃源三夫人玉源令純舉中秋月
詩純言一聯云莫辭終夕看動是隔年期桃源
曰意雖佳但不見中秋作七月十五夜亦可三
夫人因作詩云云純有和桃源之作

石恪鬼

送雷殿直

衡陽去此正三十一路程途甚坦然深邃門牆三楚外
清風池館五峯前西邊市井來商客東岸汀洲蒨釣船
公退只應無別事朱陵後洞看神仙

雅言雜載恪西蜀人善畫尤長于山水禽魚亦
攻歌詩開寶中王師下西蜀遣名畫入京恪在
其數宣于相國寺畫壁工畢乞歸出京道卒雍
熙元年殿直雷承昊奉命之衡陽與恪遇于公
舍達曉分攜為詩送承昊行數里方思恪已卒
及到任風物一如詩言

盧多遜鬼

題壁

南斗微茫北斗明
喜聞窗下讀書聲
孤魂千里不歸去
辜負洛陽花滿城

渥水燕談多遜謫死朱崖旅殯海上後其子全
扶柩歸葬江陵佛舍壁上有詩云云

晁簡鬼

贈梁固

死生離別最堪悲，相對無言淚滿衣。
歎我已歸泉下去，羨君新向月中歸。
長鞭乍見騰夷路，折翼終難繼迅飛。
珍重故人當聖代，早持釣軸入黃扉。

詩話：總龜晁奉禮簡故宮保內翰之次子也。與梁固少小硯席之至。善大中祥符二年，固狀元及第，授青州倅。時奉禮榮侍在闕下，是年冬末，梁方之任去青兩驛，夜夢晁來相謁，手攜白扇，上有七言詩一首，云：「云覽詩起執手悲泣，而別倏然滅，乃急走僕錄所得詩入京師訪其安否。」

宮保閒讀之大慟曰品格真吾兒作夢之夕乃
簡亡之日也

韶州西軒鬼

題壁

吾儕今日會嘉賓滿酌洪鍾酒數巡狼藉薰風不知曉
荔枝又是一番新

青瑣高議治平二年長沙趙琪郎中作廣東提
刑公宇在韶州西軒有荔枝數本非常繁實盛
夏方熟琪將召刺史燕賞一夕皆空皮核滿地
琪深訝之乃開西軒軒之西壁有詩一絕云云
視餘方知荔枝為鬼所竊耳二廣人多傳異之

夢中少年

侑酒歌

人生開口笑難逢富貴榮華總是空惟有隋隄千樹柳
滔滔依舊水流東

陶朱新錄吏部侍郎陳彥修有侍姬曰小姐氣
羸多病睡則多異夢宣和間一夕夢少年扶升
酒樓少年執板歌以侑酒覺猶能記云

聶昌鬼

題壁

星流一箭五心摧電掣雙眸兩臂開車馬踐時頭似粉
烏鳶啄處骨如灰父兄有感空垂淚子弟無知不舉哀
回首臨川歸未得冥中空築望鄉臺

豫章詩話聶昌字賁遠元名賁字遠山靖康中
登政府出知絳州遇害紹興中張殊自北歸過
絳驛見壁間有血書一詩時以為聶之精魂所
作

趙汝言鬼

絕句

彈指紅塵二十年歸來瀛海浩無邊夢魂相遇因隨念

珍重前生兄弟緣

睽車志趙汝言字允之死已數年有遺女住子
淳熙乙未冬住子暴疾其兄謀之憐其幼孤念
之甚至夢至一所高閣長廊金碧輝煥汝言在
其間題詩于壁云云顧語曰住子已無恙以兄
念至緣因念結故得暫相遇耳謀之慟哭而覺

史彌遠鬼

示子婦

冥路茫茫萬里雲妻孥無復舊為羣
早知泡影須臾事悔把恩讎抵死分

西湖志餘彌遠死已久一夕其家聞叩門聲曰
丞相歸舉家賊匿比入門燈轎紛紜升堂即席
子婦皆出羅拜訊慰平生歷歷囑家事索紙筆
題詩云云

統制吳源鬼

示柳春

足馬南歸望古城半林殘雨夕陽明雲邊岫接秦山色
樹裏河流漢水聲墜淚有碑苔色古攔街無曲酒旗橫
那堪回首成陳迹笳鼓西風愴客情

荆門紀畧源赴援襄陽戰歿後襄為元有道路
始通州人柳春過襄陽宿於荒村夜間偶步見

一武士仗劍披甲從者數百人其威凜肅春驚見避武士呼曰君不識我耶吾里人吳源也兵救襄城死于王事上帝嘉吾忠義命為神矣君歸幸白于吾家若不信可示以鐵券按劍朗吟云云遂擲鐵券而沒春歸訪其家白之並出所投鐵券鄉里始知源之盡節云

巴峽鬼

絕句

秋徑填黃葉懸崖露草根
援聲一叫斷客旅數重魂

詩話總龜建隆初有人行巴峽夜泊江溪忽聞詠詩云云及曉訪之但空山邃林有腳迹長二尺許

東平鬼

題竹間

墓前古木號秋風
墓尾幽人萬慮空
惟有詩魂銷不得
夜深來訪竹溪翁

竹坡詩話東平王興周為余言東平人有居竹間自號竹溪翁者一夕有鬼題詩竹間云云

周公埠鬼

上羅令

白雲分兩片
秋月正揚輝
惆悵江頭暮
無船不可歸

饒州府志羅必元咸淳中為餘干令有客被賊謀死于周公埠其魂以狀告無字照之有詩云云必元曰此必姓段名明者捕得服罪

樊若水女鬼

寄夫

楚水平如練雙雙白鳥飛金陵幾多地一去不言歸

李昌齡樂善錄鍾輻年少負才傲物樊若水愛其才以女妻之女亦才質雙盛輻登第方得意買一妾自侍命曰青箱所在狂放久不歸一日過城邑令延留飲于樓上輻醉臥忽夢其妻以一詩怨責翌日歸至采石妾忽暴死及抵家樊已死數月矣

李季萼鬼

李萼字英華開封李長卿女縉雲人傳其詩有

英華集三卷

春日述懷

園林蔌蔌日暉暉
白蜨黃蜂自在飛
公子醉眠芳草岸
風移花片點春衣

句

醒酒清風搖竹去
催詩小雨過山來

者舊續聞元豐中縉雲令開封李長卿女慧性過人姿度不凡染疾而逝殯于邑之仙巖寺三峯閣李公罷因舁歸宣和庚子青溪寇起焚燎無遺惟三峯閣獨存主簿以為廨舍濟南王傅慶及內表曹穎偕來館曹于廨治之東一夕有女子打扃而至與語皆出塵氣詰其姓氏曰開封李長卿女季萼其名英華其字辟穀有年身輕如羽知子鰥居故來相慰唱和殆無虛日曹有親陳觀察挽之從軍將就道英華與訣曰妾與君之緣斷矣子宿緣寡淡塵業未償他日當有兵難敬授靈香一瓣有急當燕以告當陰有所護不然亦無如之何也曹公勇為朔方之行不意獲譴麾下追惟英華之言欲取所遺香燕之軍行無宿火卒正法

柳氏鬼

別陶氏子

仲冬二七是良時江下無緣與子期今日臨歧一杯酒
共君千里遠相離

異聞總錄嘉興令陶彖有子得疾奇甚形色語
笑非復平日彖患之會天竺辨才法師元淨適
以事至彖素聞其名即詣謁具狀告曰兒始得
疾時一女子自外來相調笑久之俱去稍行至
水濱且言曰仲冬之月二七之期月盈之夕車
馬來迎今去秋期逼矣未知所處願賜哀憐淨
許諾杖策從至其家除地為壇設觀音菩薩像
取楊枝霑水灑而咒之三繞壇而去是夕兒寢
安然明日淨結跏趺坐引兒問曰汝居何地而
來至此荅曰會稽之東卞山之陽是吾之家古

木蒼蒼又問姓誰氏答曰吳王山下無人處幾
度臨風引舞腰淨曰汝柳氏乎慨然而笑淨曰
汝無始已來迷已逐物為物所轉溺于淫邪流
浪千劫不自解脫入魔趣中橫生灾害延及無
辜汝今當知魔即法界我今為汝宣說有楞嚴
祕密神呪汝當諦聽痛自悔恨洗既往過愆返
本來清淨覺性于是號泣不復有云是夕謂兒
曰辨才之功汝父之虔無以加吾將去矣後二
日復來曰久與子游情不遽捨願一舉觴為別
因相對引滿作詩云云遂去不復見

李媛鬼

題餘杭步伍亭壁

夜臺夜復夜東山東復東當時九龍月今日白楊風

春渚紀聞達兄子碩送客餘杭步伍亭就觀壁
後得淡墨書數行筆跡道媚後題云李援書似
非世人所作亭後有數十荒冢疑鬼憑附而書

宮人玉真鬼

贈李生

皓齒明眸掩路塵落花流水幾經春
人間天上歸無處且作陽臺夢裏人

元好問續夷堅志大定中廣寧士人李惟清元
直者與鬼婦故宋宮人玉真者遇玉真為歌二
詞

喬氏望仙鬼

題杞

蕭蕭風起月痕斜
露重雲鬟壓玉珈
望斷行雲凝立久
手彈珠淚濕梅花

異聞總錄 潭州有清淨覺地宋咸淳間游士胡
天俊寓焉月夜撫琴梅樹下遙見美女迤邐還近
前胡執其手斂衽而去曰後夜月明當赴子約
翌日友人拉入城游飲忘歸者兩宿大悔失期
亟歸于樹下得一白羅杞上有詩云云明日以
杞示人趙冰壺駭曰吾亡妾杭人喬氏名望仙
貴妃姪女也去年暴亡殯梅樹後正其筆蹟也

宮人衛芳華鬼

聚景園

湖上園亭好重來憶舊游徵歌調玉樹閱舞按梁州徑
狹花迎輦池深柳拂舟昔人皆已沒誰與話風流

西湖游覽志餘延祐初永嘉滕穆僑居臨安月
夜游聚景園遇一美人自言衛芳華故宋理宗
朝宮人即命侍女翹翹設茵席酒果歌木蘭花一
闋又賦詩云云自是白晝亦見生遂攜歸寓所
下第後美人留翹翹使守舊宅而身隨生歸里
凡三載生復赴浙試美人請與生往訪翹翹至
則翹翹迎拜于路左矣美人忽下淚云綠盡當
奉辭是夜鐘鳴急起與生分袂贈玉指環一枚

而別

寶應女鬼

絕句

長橋直下有蘭舟
破月衝烟任意游
金玉滿堂何所用
爭如年少去來休

仇池筆記秦少游云寶應民有以嫁娶會客者
酒半客一人徑起出門主人追之客若醉甚將
赴水者主人急持之客曰婦人以詩招我其詞
云云倉皇就之不知其為水也然客亦竟無它
事

碧瀾堂女鬼

絕句

水天日暮風無力
斷雲影裏蘆花色
折得荷花水上游
兩鬢蕭蕭玉釵直

異聞記安吉碧瀾堂素有奇怪有士晁紫芝嘗
與客游眺于彼迫暮共見水面一好女子衣服
楚楚手捧蓮葉足履萍草而來晁料其鬼物急
叱之女子且行且吟吟畢由東岸而去

蜀雙竹齋女鬼

二絕句

舊時衣服盡雲霞不到迎仙不是家
今日樓臺渾不識
只餘古木記宣華

小雨廉纖梅子黃晚雲收盡月侵廊
樹陰把酒不成醉
說著無情更斷腸

成都文類近李西美帥成都士人陳甲館于雙
竹齋月夜有危髻古裳衣婦人數輩語笑花圃
中甲殊不顧有甚麗者誦詩云云忽不見今府
第故蜀宮豈當時宮女尚有鬼耶按蜀檮杌宣
華故苑名

城西蘭若女鬼

題窗間

西湖著眼事應非倚檻臨流弔落暉
昔日燕鶯曾共語
今宵鸞鳳歎孤飛
死生有分愁侵骨
聚散無緣淚濕衣
寄語吳郎休負我
為君消瘦十分肌

西湖志餘宋時有吳生寓城西蘭若夜半聞叩扉聲啟視乃一處子容服雅淡問其從來以比鄰荅之強留入室遂止宿焉居數月寺僧視生容止稍疑之詰問百端乃以實告僧驚歎曰昨一官員有女才色豔麗充選內庭病卒權殯西廊三年矣曩嘗出蠱行客汝遇得非是乎不亟去禍且及矣生猶未忍至夜于窗間得一詩墨色慘淡不類人書生始懼翌日遂行

燈檠怪

絕句

郎行久不歸妾心傷亦苦低迷羅箔風泣向西窗雨

雲齋廣錄宋潛為甘陵巡檢故人趙當訓其子弟忽見美婦人立燈下唱云云遂滅燈趨趙就寢曰妾本東方人鬻身彭城郡今郎觀光上國孤眠暗室故來相伴後諸生怪趙精神恍惚具告其父潛往覘焉見一婦人宋大呼遽入以手抱之乃一燈檠耳遂焚之

畫上麗人

荅翟望歌

苔之榮兮春日陂遲濕汀蘋以建址兮冒卿雲以為帷
吹浩香以渡漢兮示秀色與華安居誰與復兮挽明月
以揚輝悵谿風兮聊詠言于茲

曹勛松隱文集翟望喜讀騷經楚些亦寓詞蘅
杜間每水邊沙外屬思幽放一夕夢麗人莊容
獨秀翳脩竹而立隔溪語望云云歌畢致一笑
而逝望寤亟書于紙心愴恍者累日後思天清
寺之菊坡謁僧琴會僧出因憩北軒有一姬先
在焉容色鮮麗疑若素識因質名氏不自知體
之前也姬笑曰妾有外姒約我會此偶故渝爽
然室有酒肴能少駐否望欣然從之稍情洽望
被酒諷苔之榮以自喜姬曰溪風之隔殆不然
矣望復叩以他辭宛不蒙荅姬先出門莫知所

適望寒東見軒壁挂玉女觀泉圖心以為畫之
靈遇作靈遇賦

蔡京鶉怪

訴蔡京

食君廩中粟作君羹中肉一羹數百命下箸猶未足羹
肉何足論生死猶轉轂勸君宜勿食禍福相倚伏

庚溪詩話蔡元長京既貴享用侈靡喜食鶉每
預蓄養之烹殺過當一夕夢鶉數千訴于前其
一前致詞云云觀此可為饕餮而暴天物之戒

宋詩紀事卷九十九

欽定四庫全書

宋詩紀事卷一百

錢塘厲鶚撰

宋初謠

寒在五更頭

宋史五行志宋以周顯德七年庚申得天下圖
識謂過唐不及漢一汴二杭三閩四廣又有謠
云云故宮漏有六更按漢四百二十餘年唐二
百八十九年開慶元年宋祚遂過唐十一年滿
五庚申之數至德祐二年正月降附得三百一
十七年而見六庚申如宮漏之數

國初士子語

文選爛秀才半

老學菴筆記國初尚文選當時文人專意此書至慶歷後惡其陳腐諸作者始一洗之方其盛時士子至為之語云

郭忠恕嘲語

近貴全為瞶攀龍只是聾雖然三箇耳其奈不成聰

遜齋閑覽郭忠恕嘲司業聶崇義云云崇義荅曰莫笑有三耳全勝蓄二心

真宗時童謠

欲得天下寧須拔眼中丁欲得天下好無如召寇老

古今風謠

無名子嘲語

張存解放旋風砲任弁能燒猛火油

詩話總龜景德初河朔舉人張存任弁皆以防
城得官無名子嘲之云云

閒忙令

世上何人號最閒
司諫拂衣歸華山
世上何人號最忙
紫微失却張君房

湘山野錄祥符中日本國遣使入貢稱國東祥
光現章聖詔建寺賜額曰神光朝辭日夷使乞
令詞臣撰一寺記是時當制者詞學不優常以
張君房代之時張尚為小官醉飲鑾樓遣人徧

尋不見中人三促之紫微大窘後錢希白楊大年因玉堂暇日改閑忙令云云蓋种放得歸山時也

寇準楊億對語

水底日為天上日眼中人是面前人

歸田錄

丁謂楊億對語

內翰拜時鬚撇地相公坐處幕漫天

王鞏聞見近錄丁晉公嘗忌楊文公一日詣晉公既拜而鬚拂地晉公云云文公起視其仰塵云云時人稱其敏而有理

開封府地讖

綿綿之罔勢如奔羊稍前其穴后妃之祥

能改齋漫錄向文簡公父為母求葬地時開封城外有地讖云云術者以穴在小民菜園中而恐民不與因夜葬其地民以向橫訴于府府尹令重與之價而不廢其菜次年遂生文簡公欽聖后文簡孫也

都人諺

陳三更董半夜

玉壺清話趙昌言為樞密副使時陳儀與董儼俱為三司鹽鐵副使胡旦知制誥盡同年生俱少年為一時之俊梁顥又嘗與同幕五人者會飲于樞第每乘醉夜方歸金吾吏遂夜候馬首聲喏儀以醉鞭指其吏曰金吾不惜夜玉漏莫相催都人諺云云

京師語

藏用篋中三斛火劉寅匣內一壺冰

詩說雋永石藏用劉寅俱擅醫名石喜用熱藥
劉喜用涼藥京師為之語云云

北宋朝中語

廚中賜食階下謝衣

歸田錄宋制大宴樞密使不坐侍立殿上既而
退就御廚賜食與閣門引進四方館使列坐廡
下親王一人伴食每春秋賜衣門謝則與內諸
司使副班于垂拱殿外庭中而中書則別班謝
于門上故朝中語云云

京師謠

朝廷無憂有范君京師無事有希文

孔平仲談苑范仲淹字希文知開封府事決事如神京師謠云云

俚語

趙老送燈臺一去更不來

歸田錄

邊上謠

軍中有一韓西賊聞之心骨寒軍中有一范西賊聞之驚破膽

孔平仲談苑寶元中元昊叛上知范仲淹才兼文武起帥延安後知慶州上以四路諸招討委之與韓琦謀必欲收復靈夏橫山之地邊上謠云云

皇祐中謠

農家種糴家收

宋史五行志皇祐五年正月戊午狄青敗懷智高于歸仁鋪初謠言云云至是果應

嘉祐中京師諺

撥隊為參政成羣作副樞虧他包省主閥殺宋尚書

東軒筆錄嘉祐中翰林諸公皆入政府時包拯為三司使宋祁守鄭州二公久著人望而不見

見

蓬州父老歌

使君來兮父母鞠我禮化行兮民無寒餓使君去兮不可復留人意悵悵兮淚雙墮

萬姓統譜吳幾復汝州人皇祐中知蓬州秩滿去父老拜送歌云

仁宗朝語

草頭木脚陷人倒

宋史蘇紳傳紳與梁適同在兩禁人以為險說故語云

京師語

關節不到有閻羅包老

宋史包拯傳拯立朝剛毅貴戚宦官為之斂手
人以拯笑為黃河清京師為之語云云

京師語

三班喫香羣牧喫糞

歸田錄三班院所領使臣八十餘人其罷而在
院者常數百人每歲乾元節餼錢飯僧進香合
以祝聖壽謂之香錢判院官常利其餘以為餐
錢羣牧司領內外功監使副判官比他司俸入
最優又歲收糞壅錢頗多以充公用故京師為
之語云

仁宗時人語

盛肥丁瘦梅香竇臭

歸田錄盛文肅公豐肌大腹而眉目清秀丁晉公疎瘦如削二公皆浙人也並以文詞知名梅學士詢慶歷中為翰林侍讀性喜焚香其在官舍將視事每晨起必焚香兩爐以公服單之撮其袖以出坐定撒開兩袖郁然滿室濃香有竇元賓者五代漢宰相正固之孫也以名家子有文行為館職而不喜修飾經時未嘗沐浴故時人為之語云云

雜占諺

芒種雨百姓苦

春甲子雨赤地千里夏甲子雨乘船入市

雲向南雨潭潭雲向北老鸛尋河哭雲向西雨沒犂雲
向東塵埃沒老翁

朝霞不出門暮霞行千里

以上孔平仲談苑

西人語

要宜麥見三白

李壁王荆文公詩注

蔡襄陳亞謔語

陳亞有心終是惡蔡襄無口便成衰

詩話總龜

劉原父嘲口吃語

本是昌家又為非類但有雄聲唯聞艾氣

沈作誥寓簡謂周昌韓非揚雄鄧艾皆病吃亦善謔也

秦人語

寧逢暴虎不逢韓王汝

東坡志林韓鎮為秦州酷暴少恩以賊殺無辜去官秦人為之語云云

熙寧中語

蜥蜴蜥蜴興雲吐霧降雨滂沱放汝歸去

冤苦冤苦我是蝎虎似恁昏昏怎得甘雨

墨客揮犀熙寧中京師久旱按古法令坊巷各以大甕貯水插柳枝泛蜥蜴使青衣小兒環繞呼云云開封府不能盡得蜥蜴以蝎虎代之蝎虎入水即死小兒更其語云云

王平甫對語

杜園賈誼熱熱顏回

東軒筆錄陳繹晚為敦朴狀時謂之熱熱顏回熙寧中台州推官孔文仲舉制科廷試對策言時事有可痛哭太息者執政惡而斥之繹時為翰林學士語于衆曰文仲狂躁真杜園賈誼也王平甫曰杜園賈誼可對熱熱顏回合坐大霧杜園熱熱皆當時鄙語

襄陽人歌

葉光化豐穀城清如水平如衡

乾道四明圖經豐稷相之為襄陽穀城令葉康直方為光化令皆有能名襄陽人歌之

元豐中諺

不因開寶火安得狀元焦

能改齋漫錄元豐八年尚書戶部侍郎李定權知貢舉其夜四鼓開寶寺寓禮部貢院火後別試更得焦蹈為魁諺云云

浙西諺

夏旱修倉秋旱離鄉

後山談叢浙西地下積水故春夏厥雨故諺云

北宋俚語

人作千年調鬼見拍手笑

雞肋編

秦晉間農夫語

小麥鑽火秀旱殺豌豆花植穀拖泥秀爛起田中瓜

侯延

慶退齋閑雅錄

元祐中童謠

大惇小惇殃及子孫

古今風謠大惇章惇小惇安惇也

章惇李士寧對語

脚踏西溪流去水手持東岳寄來書

東坡志林章惇字隱之本閩人遷于成都數世
矣善屬文不仕晚用太守王素薦賜號沖退處
士一日夢有人寄書召之者云東岳道士也明
日與李士寧游青城濯足水中惇謂士寧云云
士寧荅云云惇大驚未幾果死士寧蓬州人語
默不常或以為得道者

豬鬣闕語

說法馬留為察訪湊氣獅子作知州

桐江詩話元祐東平王景亮與諸仕族無成者
結為一社純事嘲諷士大夫無問賢愚一經諸
人之目即被不雅之名當時號曰豬鬃鬬呂惠
卿察訪京東呂天資清瘦語話之際喜以雙手
指畫社人目之曰說法馬留又湊為七字云云
彌歲不能對一日即簾因上殿泄氣出知東平
邵高鼻捲髻社人目之曰湊氣獅子仍對云云
惠卿銜之諷部使者發以他事舉社遂為齋粉

太學語

江左二寶胡仲汪藻

老學菴筆記紹聖元符間汪內相彥章有聲太
學學中為之語仲字彥時亦新安人終符寶郎

宋時諺

鳳州三出手柳酒宣州四出漆栗筆蜜

太平老人袖中錦

南京石上語

猪拾柴狗燒火野狐掃地請客坐

侯鯖錄南京人家掘得一石上有字可考云云不知是何等語也

鄙諺

張公喫酒李公醉

墨客揮犀泉州郭拙字景初有才學性甚輕脫嘗夜出為醉人所誣太守詰其情狀拙笑曰諺

所謂張公喫酒李公醉乃拙是也太守怪其不屈命取紙筆使作張公喫酒李公醉賦其畧云清河丈人方肆杯盤之樂隴西公子俄遭醪酖之愆太守笑而釋之

汴渠謗

昔有磨

去

磨

平

漿水今見碓擣冬凌

東軒筆談汴渠舊例十月閉口舟楫不行王荊公當國欲通冬運遂不令閉口水淺舟不可行而流冰頗損舟楫于是以船脚數十前設巨碓以擣流冰役夫苦寒死者甚衆京師有謗云云

心相謗

有心無相相逐心生有相無心相隨心滅

青箱雜記

酒肆歌

喫酒二升糴麥一斗磨麪五斤可飽十口

過庭錄范弇學究有酒肆歌云云

襄陽謠

襄陽二害田衍魏泰近日多磨又添一豸

墨莊漫錄田衍魏泰居襄陽郡人畏其叻謠云云未幾李豸方叔亦來郡居鄉人憎之又云云

關中醫謗

既服黃龍丹便乘白虎車

江鄰幾雜志長安張詩以能醫稱予至關中人說藥死者甚衆尤好用轉藥關中諺云云

池州語

東流速客驚動建德

史容山谷後集注東流建德兩縣皆隸池州山谷詩東流會賓客建德椎羊牛元注語云云

秦民語

寧逢黑殺莫逢稷察

宋史李稷傳稷為陝西轉運使秦民作舍侵道旁者創使納侵街錢與李察皆以苛暴著稱時人語云云

元符末都城童謠

家中兩箇蘿蔔精撞著潭州海藏神

曲洧舊聞蔡侍郎準少時常有二人見于馬前
百方懷禱不能遣慶歷二年生京而一人不見
又二年生卞乃俱滅元符末都城童謠云云至
崇寧中賣餞餚又有一包菜之語其事皆驗而
京于靖康初貶死長沙豈潭州海藏亦驗于此
耶

伶人語

右丞今日大拜都是夫人裙帶

清波雜志蔡卞之妻王夫人知書能詩詞蔡每有
國事先謀之於牀第然後宣之于廟堂時執政

相語曰吾輩每日奉行者皆其咳唾之餘也蔡拜右相家宴張樂伶人揚言云云中外傳以為笑

推官與劉韜戲語

小器易盈真縣尉窮阮難滿是推官

復齋漫錄劉韜始為尉于洪之豐城性不飲酒飲則面色為烘然郡推官沿檄抵邑能飲啖與公同會以謗語戲公公荅云云

崇寧間諺

不養健兒却養乞兒不管活人只管死尸

老學菴筆記崇寧間置居養院安濟坊漏澤園
所費尤大朝廷課以為殿最往往竭州郡之力
僅能枝梧訪語云云蓋軍糧乏民力窮皆不問
若安濟等有不及則被罪也

徽宗蔡京對語

相公公相子人主主人翁

能改齋漫錄徽宗嘗作詩句命蔡少保居安賜
元長云云元長遽對以進云

宣和民謠

打破箇潑了蔡便是人間好世界

能改齋漫錄童貫蔡京用事時謠

宣和京師語

三百貫且通判五百索直祕閣

中興姓氏森邪錄宣和初王黼為少宰置應奉司于其家四方珍貢多半隱盜公然賣官取贓無厭京師語云云

宣和間諺

金腰帶銀腰帶趙家世界朱家壤

老學菴筆記宣和間親王公主及近屬戚里入宮輒得金帶關子旋填姓名賣之價百五十方臘破錢唐時朔日太守客次有服金帶者數十人皆朱勔家奴也時諺云云

寶錄宮詩

家中木蛀盡南方火不明吉人歸塞漠巨木又摧傾

宣靖扶化錄寶錄宮之建也極土木之盛忽有題字數行于瑤仙殿左扉云云殆不可辨後方知金人之變家中木宋也南方火乃火德吉人桓木乃二帝御名

宣和民歌

臻蓬蓬外頭花花裏頭空但看明年正二月滿城不見

主人翁

宣政雜錄宣和初收復燕山以歸朝燕民來居京師其俗有臻蓬蓬歌每扣鼓和之為節而舞

次年正月徽宗兩幸次年二聖北狩

都下諺

宣醫納命救葬破家

老學菴筆記貴臣有疾宣醫及物故救葬本以
為恩然中使挾御醫至凡藥必服其家不敢問
蓋有為醫所誤者救葬則喪家所費至傾竭資
產其地又未必善也故都下諺云云

諺

三世仕宦方解著衣喫飯

老學菴筆記

齊魯諺

霜凜重霧凜窮漢備飯糗

墨莊漫錄齊魯人謗云云蓋歲穰之兆也曾子固曾有詩云園林初日靜無風霧凜花開處處同記得集賢深殿裏舞人齊插玉龍髻蓋謂是也

桃橘諺

頭有二毛好種桃立不踰膝好種橘

曲洧舊聞諺云云言桃易實可待橘實遲不可待

靖康間語

不管肅王却管舒王不管燕山却管聶山不管山東却

管陳東不管東京却管蔡京不管河北界却管秀才解

避戎夜話金人既出境朝廷措置多不急之務
和復春秋科太學生免解改舒王從祀之類時
為語云云

靖康民謠

城門閉言路開城門開言路閉

宣和遺事靖康初金人犯邊求言之詔凡幾下
往往事緩則阻抑言者當時民謠云

農諺

麥過口不入口

雞肋編謗云云靖康元年麥多高于人者既大雨所損十八

俗諺

一絢絲能得幾時絡

懶真子錄俗謗云云以喻小人逐目前之利樂也

靖康中謠

喝道一聲下階齊脫了紅繡鞵

古今風謠後金人入汴官人皆驅逐北行

建炎後語

欲得官殺人放火受招安欲得富趕著行在發酒醋

雞肋

編

京師語

吏勲封考筆頭不倒戶度金倉日夜窮忙禮祠主膳不
識判硯兵職駕庫典了潑袴刑都北門總是冤魂工屯
虞水白日見鬼

臨安語

吏勲封考三婆兩嫂戶度金倉細酒肥羊禮祠主膳淡

喫齋麵兵職駕庫咬薑呷醋刑都北門人肉餵鈍工屯
虞水生身餓鬼

老學菴筆記自元豐官制尚書省二十四曹繁
簡絕異在京時有語云云及駕幸臨安喪亂之
後士大夫亡告身批書者又軍賞百倍平時
賄賂公行冒濫相承軍饟日滋賦斂愈繁而刑
獄亦衆吏戶刑三曹吏胥人人致富餘皆寂寞
彌甚吏輩又為之語云

行在軍中謠

張家寨裏沒來由使它花腿擡石頭二聖猶自救不得
行在蓋起太平樓

雞肋編車駕渡江韓劉諸軍皆征戍在外獨張
俊一軍常從行在擇卒少壯長大者自臂而下
文刺至足號花腿軍人皆怨之加之營第宅房
廊作酒肆名太平樓般運花石皆役軍兵衆卒
謠云云

呂頤浩范宗尹戲語

草履便將為赤舄稻稭聊以當沙隄

老學菴筆記高宗南幸舟泊岸執政必登舟朝
謁行于沮洳則躡芒屨呂元直顧同列戲云云
既而旁舟水深乃積稻稭以進參政范覺民云

蜀士語

蘇文熟喫羊肉蘇文生喫菜羹

老學菴筆記建炎以來尚蘇氏文章學者翕然而從之而蜀士尤盛有語云云

紹興間鼎澧謠

若要除我除是飛來

古今風謠鼎澧間大盜夏誠劉衡楊么據洞庭湖有謠云云後為岳飛所擒

李易安語

露花倒影柳三變桂子飄香張九成

老學菴筆記紹興中張子韶對策有桂子飄香之語趙明誠妻李氏嘲之云云

紹興中浙右謠

地動白毛生老小一齊行

西湖志餘紹興三年八月浙右地生白毛勸不可斷童謠云云

都人語

曉風殘月柳三變滴粉搓酥左與言

玉照新志左與言天台名士也錢唐幕府樂籍有名姝張攬者色藝妙天下君頗顧之如盈盈秋水淡淡春山惟雲翦水滴粉搓酥皆為攬作當時都人有對云

浙西諺

蘇杭兩浙春寒秋熱對面廝啜背地廝說

雞肋編

行都童謠

洞洞張阿爺娘一似六軍之教場

白獺髓紹興初行都童謠云云忽民間遺火自
大瓦子至新街約數里

吳中俚語

等人易得久瞋人易得醜

却掃編

宋諺

日在雨落翁婆相撲

古今風謠宋諺云云言陰陽不和也

蠻歌

小娘子葉底花無事出來喫殘茶

老學菴筆記辰沅靖州蠻有花鈴有花簪有花
纓有花樓有山猺男未娶者以全雞羽插髻上
女未嫁者以海螺為數珠挂頸上男女娶而踏
歌數人吹笙前導之歌詞云云

廣東民歌

石門之水清且清晉吏一畝千古榮爭如李公投杯盟

江流洶涌杯停停

泉州府志李綸字世美邠子有清操提舉常平
適伯氏出守恩平酌于江濱兄弟相戒以清白
綸投杯于江曰儻負吾民有如此水時江流洶
洶杯停不沒者久之觀者驚歎民歌云云至今
刻石與吳隱之酌貪泉詩對云

吳諺

秋字輓損萬斛

范石湖詩集注謂立秋日雷也

宋世諺

蘇湖熟天下足

鄭虎臣吳都文粹

行都諺

東門菜西門水南門柴北門米

二老堂雜志車駕行在臨安東門絕無民居彌望皆菜圃西門則引湖水入城中以小舟散給坊市嚴陵富陽之柴聚于江下蘇南門而入蘇湖米則來自北關故諺云云

吳中下里曲

消梨應郎心上冷甘蔗應郎心上甜

羅帶十二摺小妻也是妾

稿簡贅筆

農諺

觸露不招葵日中不翦韭

爾雅翼

淮南諺

雞寒上距鴨寒下紫

老學菴筆記淮南諺曰雞寒上樹鴨寒下紫驗之皆不然有一媪云云上距謂縮一足下紫謂藏其味于翼間

永福古識

天保石移瑞雲來奇龍爪花紅狀元西東

游宦紀聞永福古識語云云乾道間福清天保瑞雲寺後石崖橫行齧地成蹊永邑東鄉石壁

松上產龍爪花其年蕭公國梁果魁天下次舉
黃公定廬唱第一蓋瑞花生處蕭西黃東各三
十五里此狀元東西之應也

淳熙間梁宋童謠

黃河災天水來

古今風謠時河決入汴梁宋間有此謠天水者
宋姓也時人以為恢復之兆

京口謠

金山屋裏山焦山山裏屋

周必大汎舟游山錄

俞塘謠

雖有珠千斛不賣俞塘北

許尚華亭百詠注俞塘在府東五里往來之舟皆可揚帆訪云云

平江識記

潮過唯亭出狀元

西山石移狀元南歸

郭象睽車志平江里俗舊傳識記云云淳熙庚子三月二十二日吳縣穹窿山大石自麓移立山半其秋八月十八日夜海潮大至過唯亭環城而西明年省試黃由以國學解中選魁天下由字子由平江人而用國學登薦南歸之驗也

河豚謗

得一部典一袴

爾雅翼鯢今之河豚率以冬至後來每三頭相從號為一部謗云云言烹和所用多也

鎮江府民歌

我漚我水以灌以漑俾我不奪蔡公是賴

宋史蔡洸傳洸知鎮江府時久旱郡民築陂漚水漚司檢郡決之父老泣訴洸曰吾不忍獲罪百姓也却之已而大雨漚通歲亦大熟民歌之云云

桂林古記

癸水繞東城永不見刀兵

桂海虞衡志

吳諺

正月逢三亥湖田變成海

浩然齋視聽抄周益公日錄正月初六日己亥十八日辛亥三十日癸亥是歲大澇湖田顆粒不收吳諺云云

淳熙中淮西歌

秀才姓汪騎驢渡江過江不得做盡趨蹌

程史曰琯按宋史止騎

驢渡江二句

宋史五行志淳熙中淮西競歌汪秀才曲云云
又為獮舞以和之後舒城狂生汪格謀不軌兵
入其家縛之其子率惡少數千為亂聲言渡江
事平格亦伏誅

俚語

閒事莫說問事不知閒事莫管無事早歸

少喫不濟事多喫濟甚事有事壞了事無事生出事

菖溪

漁隱叢話

淳熙都城謠

汝亦不來我家我亦不來汝家

宋史五行志淳熙十四年都城市井歌云云至
紹熙初其事始應于兩宮

廬山中人語

簡寂觀前甜苦筍歸宗寺裏淡鹽齋

能改齋漫錄廬山簡寂觀乃陸修靜之居也出
苦筍而味反甜歸宗寺造鹽齋而味反淡山中
佳物也山中人語云

田家雜占

甲申猶可乙酉怕殺我

風吹鶴神口米長千錢斗

未喫端午糗寒衣未可送

一九二九扇子不離手三九二十七冰水甜如蜜四九
三十六拭汗如出浴五九四十五頭戴秋葉舞六九五
十四乘涼入佛寺七九六十三牀頭尋被單八九七十
二思量蓋夾被九九八十一家家打炭壑

朝立秋暮啾啾

八月初一雁門開嬾婦催將刀尺裁

一九二九相喚弗出手三九二十七籬頭吹簞簟四九

三十六夜眠如鷺宿五九四十五太陽開門戶六九五
十四貧兒爭意氣七九六十三布被兩頭攤八九七十
二猫狗尋陰地九九八十一犁鋤一齊出

以上陸泳吳
下田家志

俗諺

一畝之地三蛇九鼠

爾雅翼

春陵語

初不敬今納命

宋史儒林傳韓侂冑擅政設偽學之禁蔡元定
謫道州遠近來學者日衆有名士挾才簡傲非

笑前修者亦心服謁拜執弟子禮甚恭時人為之語云云

寧宗朝語

由竇尚書屈膝執政

宋史許及之傳韓侂胄生日朝行上壽畢集及之後至闌人掩關拒之及之俯俛以入為吏部尚書二年不遷見侂胄流涕序其知遇之意及衰遲之狀不覺屈膝侂胄憐之遷同知樞密院事當時語云云傳以為笑

開禧民謠

天上台星少人間宣幹多

四朝聞見錄開禧用兵鄧友龍程松為宣撫宣諭使板授其屬為宣幹時政府惟有陳自強居相位民謠云云

開禧市語

滿潮都是賊滿潮都是賊

冷底喫一盞冷底喫一盞

四朝聞見錄韓侂冑用事所引率多匪類天下大計不復白之上有市井小人以片紙摹印烏賊出沒于潮一錢一本以售且誦言云云又賣漿者敲盞以喚人云云冷謂韓盞謂斬也

寧宗朝語

舍人舊錯夏商鼈御史新爭舜禹龜

後村詩話高文虎作西湖放生池記以鳥獸魚鼈咸若為商王事太學諸生為謔詞哂其誤陳晦行史集賢制用昆命元龜字閨帥倪侍郎駁論之陳累疏援引唐人及本朝命相皆用此語史擢陳臺端劾倪削秩罷去或為一聯云云

都下謠

釋迦佛中間坐胡漢神立兩旁文殊普賢自鬪象祖打殺師王

曾三異因話錄韓侂胄封平原郡王官至太師一時獻佞過稱師王晚年伏誅錢伯通在政府

奉御筆施行都下為之語云云象祖乃伯通名也繆妄稱呼至是遂作精對可發後世一笑

太學語

有髮頭陀寺無官御史臺

鶴林玉露太學語云云言其清苦而鯁亮也

臨安十七字詩

駕幸景靈宮諸生盡鞠躬頭烏身上白米蟲

西湖志餘車駕饗景靈宮太學武學宗學諸生俱在禮部前迎駕臨安府有人作十七字詩云云蓋譏其僕頭欄服歲糜康祿不得出身年年迎駕耳

占雨諺

日出早雨淋腦日出晏曬殺雁

月如懸弓少雨多風月如仰瓦不求自下

鶴林玉露

吳中舟師歌

月子彎彎照幾州幾家歡樂幾家愁

雲麓漫抄此兩句乃吳中舟師之歌每于更闌
月夜操舟蕩槳抑遏其聲而歌之聲甚悽怨

紹定中語

陰陽眠變理天地醉經綸

宋季三朝政要紹定三年上飲宴過度史彌遠臥病中時人譏之云云

紹定都城歌

東君去後花無主

宋史五行志紹定三年都城市井作歌詞末句云云朝廷惡而禁之未幾太子詢薨

端平中語

若要百物賤直待真直院喫了西湖水打作一鍋麵

癸辛雜識真文忠負一時重望端平更化人俟其來若元祐之涑水翁也是時楮輕物貴民生頗艱意謂真儒一用必有建明轉移之間立可致治於是民間為之語云云及入朝首以尊崇

道學為第一義繼以大學衍義進愚民無知以其所言為不切于時務復以俚語足之云

淳祐中十七字謠

光祖為總領許堪為節制丞相要起復援例

宋季三朝政要淳祐四年九月史嵩之丁父彌忠憂詔起復右丞相兼樞密使太學生黃愷伯金九萬孫翼鳳何子舉等百四十四人上書中有云近畿總餉本不乏人而起復未卒哭之馬光祖京口守臣豈無勝任而起復未經喪之許堪故里巷為十七字謠云云

舞十般癩語

一般癩來一般癩渾身爛了肚皮在也不礙

西湖志餘宋時吏部一胥好滑稽有董公邁參選失去官誥但存印紙遂投狀給據一日侍郎問其胥曰此事無礙否胥荅曰朝官大夫董公邁失一官誥印紙在也不礙侍郎覺其謔侮杖一百罷之蓋俗有舞十般癩云云如是凡十首語言相類故應聲為戲云

題集慶寺法堂鼓

淨慈靈隱三天竺不及閭妃兩片皮

古杭雜記詩集淳祐庚戌為貴妃閭氏建功德寺于九里松名曰集慶土木之功過于諸寺寺成建大鼓于法堂忽有人大書二句于鼓上由此界限甚嚴無故人不復得入矣

寶祐中書朝門語

閻馬丁當國勢將亡

宋季三朝政要寶祐三年巨璫董宋臣逢迎上
意起梅堂芙蓉閣奪豪民田引倡優入宮招權
納賄無所不至時人以董閻羅目之閻杞怙寵
馬天驥丁大全用事無名子書八字于朝門云

二吳謠

大蜈蚣小蜈蚣盡是人間業毒蟲
黃緣攀附有百足若使飛天能食龍

古杭雜記詩集吳潛拜相其兄淵多所攀附有
諂于理宗曰外間童謠云云

理宗朝語

橋老無人度松枝作棟梁

古杭雜記詩集理宗朝喬行簡拜平章史嵩之作相專政時人爲之語云云

又

朝中無宰相湖上有平章

西湖志餘賈似道賜第葛嶺大小朝政就決館中宰執充位而已當時語云

咸淳間語

京城禁珠翠天下盡琉璃

宋季三朝政要咸淳五年詔禁珠翠宮中簪琉璃花都下人爭效之時有詩云云識者以爲流

離之兆

臨安民謠

韓廂明無白擎韓廂死白擎起

楊維禎東維子集杭圖志有宋韓左廂者以進士起身由臨安令以嚴明升臨安府左廂官臨安剽民財者號白擎子聞公至皆屏跡謠云

臨安謠

滿頭青都是假者回來不作耍

西湖志餘賈似道當國時京師女妝競高假玉因以假為賈而景炎丙子之亂非復庚申之役

也

宋末語

龍在澤飛不得路萬里行不得幼而黃醫不得

錢唐遺事度宗崩幼君諒進士榜第一名黃龍澤第二名路萬里第三名胡幼黃京師為之語云

關子謠

使到十八九紙錢飛上天


宋史五行志宋初陳搏有紙錢使不行之說時天下唯用銅錢莫喻此旨後用交子會子其後

會價愈低故有謠云云似道惡十九界之名乃名關子而關子價愈低是紙錢使不行也

宋李謠

江南若破白雁來過

輟耕錄宋末下時江南謠云云莫喻其意及宋亡蓋知指已延丞相也



宋詩紀事卷一百